

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

"Te vai atura hoi te tau e ore ai ratou e farii ai i te parau mau, no te anoenoe ra o to ratou tari'a, e haaputuputu ia ratou i te orometua i au ai i to ratou iho hinaaro; e fariu e hoi to ratou tari'a i te parau mau, a opai tia'tu ai i te fabula."
Timoteo II, 4: 3, 4.

Nu. 7.

Tiurai, 1913.

Mat. 6.

Teiheia Ra te Parau Mau?

(TUATIRAA.)

U A parau atura Tihare e, "E teie nei, ua hi'opoa tatou i na parau tumu e toru o te Evanelia o te ora, e te vai atura te hoê parau tumu ta'u i hinaaro ia ferurihia e tatou. Te mana'o nei au i te Varua Maitai. Ua haamana'o paha outou i te a'oraa a Petero i te mahana Penetekose, tei faaitehia i roto i te Ohipa i te pene piti. E ite a'era ratou (te ati Iuda) i tana parau ra, putapû atura to ratau aau, oia hoi, ua tupu te faaroo i roto i to ratou aau i te mau mea ta Petero i parau atu ia ratou, e ua na ô maira ratou ia Petero e te mau Aposetolo atoa ra, 'E te mau taeae nei, eaha na matou?' Tirara, ua ite tatou e, tei Petero te mana ia pahono atu i to ratou uiraa, no te mea tei ia'na te mau taviri o te basileia ta te Mesia iho i horoa'tu ia'na, e oia te peresideni no te mau aposetolo."

"Parau mau te reira, area râ, eaha te huru o ta'na pahonora a i ta ratou uiraa?" parau maira te haapii ture.

Ua parau atura Tihare, "Tei te Ohipa, te pene piti e te irava 38, ta'na pahonoraa. Ua na ô atura te taioraa: 'Ua parau Petero ia ratou, E tatarahapa, e ia baptizohia outou atoa i roto i te i'oa o Iesu Mesia ia matara te hara, e horoahia mai ia te Varua Maitai ia outou.' "

"Eaha te ravea i roaa'i ia ratou te Varua Maitai?" parau maira te taote.

"Na roto i te tuuraa i te rima. Ia haere atura Petero raua o Ioane i Samaria e farerei i te mau taata tei mau i te parau a te Atua, e tei baptizohia e Philipa, ua pure a'era raua i te Atua ia horoa oia i te Varua Maitai ia ratou, tei farii i te parau maitai e te baptizo. Ei reira, ua tuu atura raua i to raua rima i nia ia ratou, noaa ihora te Varua Maitai ia ratou ra. Ohipa 8: 17. Ua na reira'toa Anania ia Saulo, mai tei faaitohia i te Ohipa, te pene iva e te irava 17. Ua haapao Paulo i te reira huru i to Ephesia, tei farii i te parau oaoa. Ohipa 19: 2-6. Ia farii te mau taata i teie fanauraa o te Varau, Ioane 3: 5, farii atoa ratou i te mau haamaitairaa parauhia ra, no te mea ua parau te Mesia iho e, 'E te feia faaroo ra, e riro ia ratou teie nei mau tapao: e hee te mau demoni ia ratou i to'u nei i'oa; e parau hoi ratou i te parau apî; e rave noa hoi ratou i te ophi; e ia inu ratou i te mea taero e ore ratou e ino; e ora hoi te ma'i ia ratou ia tuu i to ratou rima i nia iho.' Mareko 16: 17, 18. E teie nei, ua noaa ia tatou te ite i te mau mea hinaarohia e te Atua, oia hoi, te faaroo, te tatarahapa, te baptizo ia matara te hara, e te tuuraa o te rima no te fariiraa i te Varu Maitai, ma te mau tapao i parauhia i te feia faaroo ra." Ua na reira'tura Tihare.

Ua parau maira te taote, "A haamana'o râ tatou e, ua horoahia te mau tapao i te tau o te mau aposetolo, ia faatia ratou i te ekalesia i rotopu i te tamarii a te taata nei, e ua faaorehia te mau tapao i teie nei tau, no te mea e mea fau-faa ore te reira i te ekalesia."

"Ei te ture ei te parau ta ratou e imi," parau atura

Tihare, “e faaite mai ia matou i te parau tei faatia i te reira parau.”

Ua parau maira te taoté e, “Mai te mea e taio oe i te pene 13 no Korinetia hoê, e ite oe e, ‘E ore roa te aroha e mou; area te mau tohu, e mou ia; area te parau êê ra, e ore atoa ia; area te ite ra, e faaorehia ia te reira.’ ”

Ei reira, ua parau atura Tihare e, “E taio â tatou e ite ai oe e, ‘Te ite pae tahi nei tatou, e te tohu pae tahi nei. Ia tae râ i te mea tia mau ra, ei reira te mea pae tahi noa ra e faaorehia’i.’ E hoa e, aita roa te irava ta oe i taio e faaore i te parau e, e riro i te feia faaroo te mau tapao i parauhia ra, e faatia râ. Na roto i teie na irava ta’u i taio a’enei, e ite ai tatou e, e vai noa te mau tapao ia tae te tia mau ra. Teihea te taata paari tei parau e, ua tae mai te tia mau e no reira ua faaorehia te mau tapao?’ ”

Parau maira te taote, “Ua haapiihia vau e te mau orometua evanelia ia faaroo e, e mea faufaa ore te mau tapao i teie nei tau.”

“Aita vau i maere i te reira,” parau atura Tihare, “no te mea, te taio nei tatou i roto i te Bibilia maitai e, ‘Te vai atura hoi te tau e ore ai ratou e farii ai i te parau mau, no te anoenoe ra o to ratou tari’a, e haaputu ia ratou i te orometua i au ai i to ratou iho hinaaro; e farii ê hoi to ratou tari’a i te parau mau, a opaitia’tu ai i te fabula.’ ” Tim. II, 4:3-4.

“Ua roaa ia’u te ite e, ia baptizohia vau e tia’i,” parau maira te taote, “e ia baptizohia vau, te hinaaro nei au ia baptizohia ma te utuhi i raro i te pape.”

“Ua mauruuru au i ta oe parau, e e faaite mai anei oe ia’u, na vai e baptizo ia oe na?” Na reira’tura Tihare.

“Te mana’o nei au e, na to’u orometua e baptizo mai ia’u. No te aha?”

“Mai te mea e parau mau te Bibilia, aita paha to to oe orometua e mana ia baptizo ia oe.”

Ua parau maira te taote, “Te mana’o nei anei oe e, aita o te mau orometua evanelia i Cherisetiano e mana ia haapao i te mau oroa o te evanelia? Eaha te mea ta oe e

faaite mai ia matou? Noa'tu râ, ua ineine matou i te mau mea maere."

Parau atura Tihare e, "Te hinaaro ana'e nei au ia paraparau i nia i te mau parau e au ia tatou e ite, ia noaa ia tatou te ora mure ore. Ua paraparau a'enei tatou i nia i na parau tumu o te evanelia, e teie nei e paraparau tatou no te mau toroa ta te Mesia i tuu i roto i ta'na ekalesia, ia ite ai tatou i te mau ravea, e roaa i te taata te mana e rave i te hoê ohipa na roto i te i'oa o te Atua. Ua faaite Paulo ia tatou e, 'E ua tuu hoi te Atua i te aposetolo i roto i te ekalesia, o mua ia; e te piti ra, e peropheta ia; te toru ra, e haapii ia, e te rave tapao, e te faaora ma'i, e te tauturu, e te faaite, e te parau êê, (Korinetia I, 12: 28.) e i patuhia (te ekalesia) i nia iho i te niu o te mau aposetolo e te mau peropheta ra, e o Iesu Mesia iho te tihirahi.' Ephesia 2: 20. Ua parau atoa oia e, 'Ua tuuhia teie nei mau toroa i roto i te ekalesia, ei faaau i te Feia Mo'a i te ohipa ra e orometua, e e vai teie nei mau toroa i roto i te ekalesia ia riro tatou atoa nei ei taata paari, i te faaroo hoê e te ite hoê i te Tamaiti a te Atua.' Ephesia 4: 11-13. Ua riro ana'e anei to te ao nei ei hoê i te ite i te parau mau? Mai te mea aita, no te aha te mau taata i faaore i te mau toroa ta te Atua i tuu mai i roto i te ekalesia ia riro tatou atoa ei hoê i te faaroo? Parau maira Paulo ia tatou e, ua tuuhia teie nei mau toroa i roto i te ekalesia ia ore tatou e aueue noa i te mata'i ra, i tera parau, i tera parau, mai te tamarii ra, i te ravea a te taata nei, e te parau i te mau peu atoa o te haavare ra. Ephesia 4: 12-14. I teie nei anotau, ua parau te mau orometua e, e mea faufaa ore te mau aposetolo e te mau peropheta. Te mârô noa ra ratou ratou iho, e aueue noa'i i te mata'i, i tera parau e i tera parau, mai te au i te parau na Paulo. Ia moe teie mau toroa i to te ekalesia, ua moe atoa ia ia ratou te mana ia rave i te ohipa na roto i te i'oa o te Fatu. Ua moe te mau horoa e te mau haamaitairaa, (oia hoi te mau aahu nehenehe o te evanelia), i te ekalesia, e te tia tahaa noa ra oia, e te parau noa ra te mau orometua evanelia e, aore a te mau horoa e te mau haamaitairaa, e te mau toroa ta te Mesia iho i tuu mai i roto i te ekalesia, e faufaa i teie nei mahana."

(E tuatihia mai teie parau.)

Te Parau Tuatapapa no
Iosepha Semita.

(TUATIRAA.)

PENE XXXIV.

MATAHITI 1841-42.

Ua hapono atura te tavana ra, o Caralina, i te faaueraa tahito no te tapearaa ia Iosepha ma. Utuutu ihora Iosepha i te mutoi rahi. Te haavâraa. Te poheraa no Dona Carosa Semita. Ua riro ia na mataeinaa Inidia e piti ei mau manihini no te Peropheta. Te haamataraa o te baptizoraa no te feia i pohe ra. Ua faatiahia te Pupu Vahine matamua no te Ekalesia.

U A noaa i te Ekalesia te mau mahana manuïa, e te oaoa, i te haamataraa o te matahiti 1841. I te amuiraa no te Ekalesia, i haapaohia i te 6 no Eperera, ua haamauhia te mau tihi no te hiero i Navu, e e toru mahana i muri iho i te reira, ua faatoroahia o Limana Uaita ei Aposetolo. I teie nei, ua i te pûpû ahuru ma piti Aposetolo, e te rave noa ra e hoê ahuru ma hoê no ratou i te ohipa no te Evanelia.

Ia tae i te tau veavea, ua haere atura Haeramu Semita raua o Viliamu Lau e poro-haere i te Evanelia i te pae i te hitia o te râ, e haere atoa'tura Iosepha i pihaiho ia raua, na te anavai ra, o Misisipi, e tae noa'tu i te oire ra, i Tui-nici. Te parahi ra te tavana ra, o Caralina, i reira, e haere atura Iosepha i to'na fare e farerei ia'na, e ua paraparau maitai roa raua te tahi i te tahi. I maiti na boi te tavana ia Iosepha ei raatira no te Nuu no Navu, i te tahi na ava'e i mua'e i te reira, e aita i parauhia te hoê parau no te faaueraa no te tapearaa ia Iosepha, tei haponohia e Caralina i roto i te ava'e Setepa, i te matahiti i mua.

E faarue a'era râ Iosepha i to'na fare e haere i Navu, ua itea ia Caralina taua faaueraa tahito ra, e tuu ihora oia i te reira i roto i te rima no te mutoi rahi, e tono atura ia'na

e te tahi atu â mau taata, e te hoê ia taata no Missouri, ia tapea ia Iosepha. Ua iteahia oia e ratou i te hoê vahi, e piti ahuru ma pae maile te area mai reira atu i Navu, e tapeahia ihora; ia haamata râ teie taata no Missouri i te parau haamăta'u, e te tuhi noa, ua patoi a'era te pae rahi o te mau taata, o tei tonohia mai ia tauturu i te mutoi i te tapearaa ia Iosepha, e parau atura ratou e, e ore roa ratou e tauturu atu i te reira huru ohipa. Ho'i atura Iosepha i Tuinici, e faataa ihora o Setephano A. Dougalasa i te mahana 8 no Tiunu no te haavăraa, e haapaohia i Monamouta, i te mataeinaa ra, i Warena.

Ua haere atura Iosepha, e te mutoi atoa tei tapea ia'na, i Navu, area râ a haere atu ai raua i reira, pohe ihora te mutoi i te ma'i. Ua afai atura Iosepha ia'na i to'na iho fare, e utuutu maite noa ihora oia ia'na. I te mahana i mua'e i te haavăraa i poipoi roa, haamata a'era Iosepha, e e piti ahuru hoa no'na, i te haere i te oire ra, i Monamouta, e tae atura ratou i reira i te mahana i muri iho. I faatupu na hoi te tahi mau orometua i te mana'o ino i roto i te mau taata, e ia tae atura Iosepha ma i te oire, tamata ihora te hoê pŭpŭ taata i te haru ia'na, ua paruruhia râ oia e te mutoi. Aita i haapaohia te haavăraa i taua mahana ra, e ua tapea-maite-noa-hia Iosepha i roto i te fare auri, e tae noa'tu i te mahana 9 no te ava'e.

Ua paruru a'era e tooono haapii ture turatura ia Iosepha, i roto i te haavăraa, e tuu maira ratou i na tumu e piti, ia ore ai te Peropheta e afaihia i Missouri. Te hoê ra, ua riro ia te faaueraa no te tapearaa ia Iosepha ei mea faufaa ore no te mea e, i haponô-ê-hia na te reira, e ua faaho'ihia maira i te tavana ra, ia Caralina, e no reira aita i tia ia haponô-faahou-hia; te piti ra, te mau mea i ravehia e to Missouri, e mau mea au ore roa ia i te ture no te fenua, e ua noaa ia ratou to ratou mau pariraa ia Iosepha, na roto i te hoo, e te mau ravea tia ore. O Setephano A. Dougalasa ia te haavă, e faaue atura oia ia faatiamăhia Iosepha, no teie

na tumu i faaitehia nei. Ua tarahuhia te mau haapii ture e rave rahi, o tei patoi mai ia Iosepha ma i roto i te haavâraa, e to te tahi mau haapaoraa, e ua tae mai hoi te tahi pae no ò mai i Missouri ia tamata i te faautua i te Peropheta.

O O. H. Baroninga ia te haapii ture rahi na Iosepha, i roto i te haavâraa, e e oti a'era oia i te faaite atu i te auraa mau no te ture, parau atura oia no te tia-ore-raa o te afairaa i te Peropheta i Missouri ia taparahihia e te mau taata taehae no taua tufaa fenua ra. Ua faaite atura oia i te huru no te mau ati e te mamae i faaoromaihia e te Feia Mo'a, e a faaite atu ai oia i taua mau mea ra, te tahe noa ra te roimata o te mau taata tei faaroo i ta'na parau. O teie hoi ia te mau parau hopea no ta'na a'oraa i taua mahana ra:

"E te Atua rahi! aita anei au i ite i te reira? E, ua ite hoi to'u iho mata i te mau tapuae avae, ma te toto, no te mau vahine e te mau tamarii hara ore, i roto i te tau toetoe roa ra, o tei haere na raro noa, na hanere maile, ma te tiaa ore, na roto i te hiona, i te imiraa i te hoê haapuraa no ratou. E mea ri'ari'a ia i te hi'oraa, e ua navai ia ia faatupu i te aroha i roto i te aau etaeta. E teie nei, e afaihia anei taua taata atihia nei, o tei maitihia e to ratou riri ei tusia, i roto i taua fenua taehae ra, e aita e hoê tei ore i mätä'u i te tauturu mai ia'na i te mea tia? Ahiri aita'tu e hoê re'o i raro a'e i te ra'i ra, e faaroohia i roto i taua ohipa purururaa nei, maori râ o to'u iho re'o nei, e tia oaoa vau ana'e, e e mauruuru hoi au, ia pau to'u aho hopea i te parururaa i te hoê taata Amerika i hamani-ino-hia ra."

I te ahiahi no taua mahana ihora, ua anihia o Amasa Limana, peresibutero, o tei tae atoa i te haavâraa, ia a'o i te mau taata i reira, e ua na reira oia, e i muri iho, ua maitai a'e te mau mana'o no taua feia ra i te Peropheta e te Feia Mo'a. Ua vai etaeta noa râ te tahi mau taata, e haaparare noa'tura ratou i te mau parau haavare no Dougalasa, haavâ, e te haavâraa; parau atura râ te mau taata mana'o tia e, ua tia roa tei ravehia e Dougalasa i reira. Ua rahi te oaoa no te Feia Mo'a, ia tae atura Iosepha i Navu, no te mea ua mana'o ihora ratou e, o te hopea ia te reira no to ratou hamani-ino-raa-hia e to Missouri.

I roto i te ava'e Tiurai, e te tau ava'e i muri a'e, ho'i

maira e tooono Aposetolo, mai Beritane mai, e ua faatupu ia i te oaoa i roto i te aau no Iosepha. Te tupu noa ra te hopoia no te faatereraa i te Ekalesia i te teiaha, e hinaaro ihora oia i teie nei mau taata maitatai ia tauturu mai ia'na i te raveraa i taua ohipa rahi ra. E mau hoa maitai ana'e ratou no'na, e ua rahi hoi to'na aroha ia ratou. Ua faaorehia râ to'na oaoa no to ratou ho'iraa mai, e no to'na tiamâ, e te poheraa o to'na teina ra, o Dona Carosa Semita, o tei pohe i te mahana 7 no Atete. I roto i te hoê ahuru ma maha o to'na ra matahiti, haamata ihora teie tamaiti i te poro-haere i te Evanelia, mai te haere i pihaiiho i to'na metua tane. I muri a'e i te reira, haere faahou atura oia i te poro-haere-raa i te Evanelia i te tahi atu â mau vahi, e e tae a'era i te hoê ahuru ma iva o to'na ra matahiti, faatoroahia ihora oia ei peresideni no te Pŭpŭ Tahu'a Rahi, e i to'na poheraa, i te piti ahuru ma ono o to'na matahiti, e raatira oia no te Nuu no Navu, e e hoê oia no te pŭpŭ taata faatere no taua oire ra.

I teie nei, ua riro ia te mau taata Inidia e rave rahi no na mataeinaa e piti, oia hoi, to te Saca e to te Foxa, ei mau manihini no te Peropheta. I taio na hoi te tahi pae no ratou i te Buka a Moromona, e hinaaro ihora ratou ia farerei i te taata, tei iriti i taua papaa parau rahi no to ratou hui tupuna ra. Ua faaite ihora Iosepha ia ratou i te huru no to ratou haamataraa, e parau atura oia e, ua parauhia e te Atua, ia riro ratou ei feia parau-tia, ei reira e riro ai ratou ei feia uouo e te nehenehe hoi. Ua a'o atura oia ia ratou ia huna i te to'i, e te mau mauhaa tama'i, e ia ore e tama'i faahou; ia parahi râ ma te hau e te peapea ore. E oti a'era ta'na parau, ua na ô maira te hoê o te mau Inidia rahi, o Keokuka to'na i'oa, "Te faaroo nei au e, e taata rahi e te maitai oe; e taata taehae au i te hi'oraa, e tamaiti râ vau na taua Varua Rahi ra. Ua faaroo hoi au i ta oe a'o, e te opua nei matou ia faaea i te tama'i, e ia haapao i te mau parau maitatai ta oe i paran mai ia matou nei."

I te amuiraa no te Ekalesia, i haapaohia i te uru raau i Navu, mai te haamata i te 2 no Atopa, ua a'ohia te parau no te baptizoraa no te feia i pohe ra e te Peropheta i te taatoaraa o te Ekalesia. I haapiihia na hoi teie parau i te mau Aposetolo e i te tahi atu â mau taata, aita râ i haapiihia i te mau taafa'toa no te Ekalesia. Ua î roa ihora te Feia Mo'a i te oaoa i te faaroo e, e tia i to ratou mau metua, e to ratou mau fetii, e te mau taata'toa, o tei pohe mai te ore i ite i te parau mau no te Evanelia, ia noaa te ora mure ore mai ia raton te huru. I haapaohia na te tahi mau baptizoraa; i teie nei râ, ua parau atura te Peropheta e, eita e haapao-faahou-hia te baptizoraa no te feia i pohe ra, ia tae i te taime e nehenehe ai ia haapao i te reira i roto i te hiero. E hoê ava'e i muri a'e i te reira, i ineine ai te vahi baptizoraa i roto i te hiero, e muri iti a'era ua haamaitahia ia e Birikama Youne, e haamata-faahou-hia ihora taua ohipa baptizoraa ra.

I te ava'e Febuare, 1842, haamata ihora Ioane Tela raua o Virifora Vudurufa, na Aposetolo, i te nenei i te hoê vea i parauhia, "Te Mau Taime e te Mau Tau", e i te ava'e i muri iho, ua riro ia Iosepha te faaau parau no taua vea ra. O te maha ia teie o te mau vea no te Ekalesia i neneihia ra.

I roto i te ava'e Mati, ua faatiahia te Pŭpŭ Vahine Faaora matamua no te Ekalesia, i Navu, i raro a'e i te faatere-raa o te Peropheta, e ua maitihia Ema Semita, te vahine na Iosepha, ei peresideni no taua Pŭpŭ Vahine ra, e o Eliza R. Seno ia te papai parau.

—OLE PETESONA.

(E tuatihia mai teie parau.)

"Oia ia, te hamani ino ra ratou ia ratou, e te faaino ra ia ratou i te mau huru parau atoa ra, e te na reirahia ra ratou no to ratou haehaa; aita hoi ratou i teoteo i to ratou iho aau, e te haapii ra ratou i te parau a te Atua te tahi i te tahi, aore e moni, aore atoa e hoo." Buka a Moromona, Alama 1: 20.



TE ITEARAA O MOSE I ROTO I TE AIHERE, I TE HITI
PAPE RA.

Te Mau Parau Api.

I ROTO i te mahana hoê, ua roaa e 35 tohorâ i na pahi Amerika e toru. Te imi noa ra te mau taata ravaai i taua i'a rahi ra, no te moni rahi e roaa no to'na hinu.

Na roto i te imiraa o te feia paari, ua iteahia i teie nei e, e ere te fetia maramarama roa, i parauhia te Fetia Apatoerau, e hoê noa iho fetia, e toru râ. E mau fetia rarahi roa taua na-fetia e toru ra, e e au i te mahana te huru.

I roto i te ava'e ra i Setepa, e tae mai i te Tahiti nei te hoê pahi apî e te nehehe. O Willochra te i'oa o teie nei pahi apî. E pahi rahi teie, e e roaa to'na faito e hitu tausani o te tane e te tiahapa, e ua huru au oia i te pahi auahi ra, o Tahiti, i te rahi. E tae mai oia ei mono i te pahi auahi ra, o Aorangi.

I roto i Tiunu, ua tomo roa te pahi ra o Makemo. Mai tera te huru o to'na ati, ua tere maira oia mai Hao mai i Marutea, e i te tuiaraa pô, ua û noa oia i nia i te toâ, parari roa ihora. E vahi ino roa te vahi ta'na i û ra, no te mea aita roa e tumu haari i reira, e aore roa te fenua i iteahia i te pô. Aita rea te taihaa i roaa mai, ua ora roa râ te mau taata i nia iho i te pahi.

I te 24 no Me, ua tupu te hoê ati rahi i Long Beach, i Tarafonia. E mahana arearea te reira no te mau taata mai Beritane mai, e to ratou mau hoa. Ua tairuru mai e 10,000 taata, e ua parahi e rave rahi i nia i te hoê uahu tahua piti, e ua topa taua uahu ra i raro. No te rahi o te mau taata i nia i te tahua piti, i topa niai te reira i nia iho i te mau taata i raro a'e, ei reira ua mairi roa te uahu i raro. E toru ahuru te mau taata i pohe roa, e e rave rahi roa i haaparuparuhia. Te pae rahi o te mau taata i pohe roa, e mau vahine ia.

I te oire ra, i Winnipeg, i Canada, ua taparahi pohe roa te hoê taata Heleni i ta'na vahine apî. Ua parihia ta'na vahine i te faaturi, e ua rave ta'na tane ia'na, e ua ninii oia i te mori arahu i nia ia'na, e puru roa'tura to'na ahu i te mori, ei reira ua tutuihia i te auahi. Ua parauhia e, e peu tahito roa teie huru ohipa no te mau taata Galatia, e i te taime i parihia i teie nei vahine i te ohipa taiata, ua ani mai oia i ta'na tane ia rave mai ia'na, mai tei au i te peu tahito, e mai te mea ua mamû noa oia, a ama'i to'na tino i te auahi, e tapao ia te reira, ua tiamâ oia i te hara i parihia'i oia ra; e mai te mea ua maniania oia, e tapao ia te reira, ua hara oia. Ia ama te tino o taua vahine ra, aore roa oia i auê noa'tu e taime maoro rii, ei reira ua horo oia i rapae i te fare, mai te pii hua'tu e te auê rahi, e pohe roa'tura. Te huru, e taparahihia te tane no taua ohipa i rave ra.

A paumu ai te hoê taata i te uaua o to'na pereoo uira, ua haruru taua uaua ra, e ua paruparu ino roa taua taata ra, e e riro e, e pohe oia. No te paumu etaeta roa te tumu i haruru ai taua uaua ra.

I roto i te ava'e ra i Me, ua pupuhia te hoê patu tapearaa miti i Panama, e i teie nei, ua tahe te miti Patitifa i roto i taua tâpûraa ra. Ua tausani te taata tei mataitai i taua pupuhiraa patu ra, e ua parauhia e mea nehenehe roa, e te puai roa hoi, te haereraa o te miti i roto i te tâpûraa.

Ua oti a'enei te hoê faaauraa parau ia faahau Turekia e te mau fenua Balakana, e te huru, ua pau o Turekia. Te peapea rii noa ra te mau fenua Balakana ratou iho, e i roto i Me, ua tomo te mau faehau no Bulagaria i roto i te hoê oire iti, Hadji, i te fenua ra i Solonica, e ua taparahi pohe roa ratou i to taua oire iti ra e hope roa'e, te tane, e te vahine, e te mau tamarii atoa hoi. E mau taata i parauhia Mussulman teie nei mau taata i pohe ra.

Tei te hau Tinito te hoê maramarama, aore roa i iteahia e vetahi mau taata. Te tapea maite nei taua hau ra i taua mea ta'na i ite ra, e ua opani-roa-hia te feia rave taua ohipa ra na te hau, eiaha roa ratou e faaite atu i taua ohipa ra. O taua ravea paari ta te Tinito i ite ra, o te hamani-raa ia i te faautente mai te inita uteute te huru. E nehenehe noa ia hamani i te tahi mau huru faautente i teie nei utente i parauhia nei, aita roa ia e roaa i te mau taata. O te pohe ia te utua no te faaiteraa'tu i taua ravea paari na te hau.

Te vai nei te hoê peapea rahi i rotopu i Amerika raua o Iapone, e tera mai hoi te peapea. I na ava'e a'enei, ua hamani te hoê mataeinaa no Amerika, oia hoi o Tarafonia, i te hoê ture apî, o tei na ô mai nei e, eita e tia ia riro te hoê taata ei fatu fenua, o tei ore e nehenehe ia riro ei taata Amerika tiamâ. E mea nehenehe noa ia riro te mau taata maitatai ei feia Amerika mai te mea e haapao ratou i te ture e au i taua ohipa ra. E farihia te mau taata mai te Farani, e te Beritane, e te Purutia, e vetahi e mau taata te huru, ia riro ratou ei mau taata Amerika. Te Tinito râ, e te Iapone, e te tahi atu â mau huru taata, ua opani-roa-hia ia, e aita hoi te hau Amerika i hinaaro ia ratou. Na roto i teie ture apî no Tarafonia, e peapea rahi roa tei tupu, e te mana'o nei e rave rahi te taata e, o te tama'i ia te hopea no taua peapea ra. Mai te taime ua vî Rusia ia Iapone, ua tupu to Iapone i te teoteo rahi, e te mana'o nei ratou e, ua faito ratou i te mau papaa atoa.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.